

Do liffen sihe ober steyne vnnnd reyne. Vnnnd dy Parten dy noch hinne worenn, krochenn zcum Huntloche zcur stat awss.

Also worden sie aber mals zcustrewet. Dass y got dem Rothe geholffen hath.

Anno etc. lxxi⁰.

25. Tuchmacher Anno etc. lxxi⁰: Tuchmacher habenn geclaget ober die Sneider, das sihe Gewandt snittenn, geblecket vnnnd vngeblecket, vnnnd in jren hussern: Vnnnd wer do sneiden welde, soude by enen vnder den Loubenn stehenn.

Doruff hath sich der Roth jr jnnert, das ess gescheen ist, am tage do man Casparum von der Wese her jnn brachte, das mit den Tuchmachern geredet ist, das sihe fort kein gebleckete Tuch machen souldenn. Es soude ouch nymant Selbfur tuch, adder durch geruckte,¹⁾ als die Behemischen sein, dy man muss dy Weisenn loppenn tortenn vnder fünff grosschen nicht sneiden noch kauffen noch verkauffenn, Sunder dy Ele vmb fünff gr. vnd darober mochte sy eyn jderman sneidenn. Das wir jn ainmenden gedenckenn.

Vmb das Sneidegelt wüstenn die Tuchmacher wol wy sihe das obenehmen souldenn, beide von enen vnnnd ouch von den Sneidern.²⁾

Dorby hath Er Greger Selige vnderrichtunge gethann, das vor Jaren alle Zeechenn alles uff das Rathhuss antwortenn, wes sihe zcu gemeyner awssrichtung vnnnd zcu zcirung jrer Kertzenn etc. nicht bedorfften. Dornach qwam ess jnn der Ketzerey, das man uff alle Hantwercke pferde satzte. Do nohmen die Hantwercker das zcu Hülffe. Do mit ist ess abegehangenn. Vnnnd sidder der zeit habenn sihe nichts geantwortt uff das Rathhuss. Sunder vnderweilen haben dy vom grossen Hantwerck zcu den kirchenn eyn etzliche sck. gr. gantwort.

Die Tuchmacher habenn ouch das Wandel genommen von den Sneidern, von eynem Tuche drei gr. Do widder auch von dem Roth geredet ist, So diss enen nicht, sunder dem Rathe geboret, dy dingk vorwandelt zcu nehmen. Dann eyne zcehe dy ander nicht büssen soll, vnnnd dorawss gross vnwille kommen mochte.

26. Von den grossen Rorenn adder Anzucht. Dy hath Er Greger Selige selb X. helffen buwen: Vnnnd gehett biss an dy Neisse: So das alle dy dar jn habenn gewillet, haben müssen gloubenn, werde ichtes brochs an der grossen Rorenn, das sihe weldenn alle dorzcu helffen, itzlicher noch seyner anzcal. Ob ouch do vonn den Luthenn ichtes schadenn thette adder geschege an Kellern, hewsern etc. das sollen sihe by pflicht alle helffen wandeln.

Dorumb wer dorjnn buwet, sol dem Rathe jo etzwas zcu stewer geben. Do von so ichtes gebruch wirdt, man die grosse Rore bessern sall. Vnd wo das wendet, dor zcu sol eyn itzlicher helffenn, nach seiner anzcal.

¹⁾ Selbfur = selbfarben. durchgeruckte = durchgezogen.

²⁾ Ein itzlich Sneider der do Gewant sneidet, muss geben dem Tuchmacher uff itzlich Quatuortempus 2 gr.: haben mich die Sneider vnderricht selber. Anno lxxvij⁰ am tage Donati mart. (n. Frauenburgs).